

Pariedka nebēšjē

Anuo suoduo tuoki Pilimana Rokšienē so sūno Petrio ūkininkava vēinodo. Tievalis priš kelis metus jau bova mērēs. Vēina vakara, jiedont večerē, muotina ē sāka sūnou:

- Petrali, čiesos būtom parsēvestē jauna gaspadēnē.
- Vuo kam mon anuos rēk? – padiejēs šaukšta šalēp torielkā rokou Pietris.
- Jug to regi, ka aš jau vēsā pasenau, ē niekam nebdero.
- No gerā, gerā veiziesio. Bet je tau neētēks, aš nebūsio griešnos.
- Gerā, gerā bus, sūnieli, juk akis tori.
- Mama, veiziek tau žekrīšis nosmokēs nu staibē – patiemējēs sāka Pietris.
- No va, matā, ka aš jau pamietēis nebtoriu – taisīdama žekrīši atsakē muotinalē.

Veina sobatuos poiki rīta, pasēkinkēs Dolē i pavažioutēs ratelius, Petris ēšbrakšnuojē patiuos ēiškuotē. Vazioudams ožsoka pas Lieksi, ka šēs pabūtom pēršlio. Muotina ēšvazioujētēms vīrams pataisē pravēnta. Keliuonē tuolēma – ēšalks. Atpjuovē ciela šmuota kinzoka, abēšala mēižainē ē gēra gāla kēlbasa. Vēskou sodiejē i sena lopatē tašē ēr ēdavē sūnou.

Novaziava anodo ē kētuos parapējēs gāla pas Jezbiene Aguota. Lieksis žēnuojē ka tēn īr pana Kuotrelē. Truobalē stuoviejē pri pat opēs, medēs apaugusi. Žaliava ē nu viejē lingava epošēs, beržā, lēipas.

Vīrā ēējē i truoba pagarbēna puona Jēzo ēr prēsēstatē kas ē ēš kor esou. Pri pečiaus ont zoslana siediejē longieta koska apsēsiautosi, basnertā ē konteplēs ēsēspīrusi senuoka muotrēškelē.

Asluo pri longa, žēidouta koskelē apsēguobosi, aple trisdešimtēis metu nešpietni mergēkē verpē lēnus. Ka jau ruoda ēsēlingava Lieksis ēr klaus.

– Kāp ta Kuotrelē, a nie slinka, a svēka, a kavalieriaus netor?

– Je je, vīrale, mona geruoji doktērelē īr dedēlē darbšti. Ni dēinelēs be darba nestuov. Ka tiktā bēški tor liousa laika, tujau sied pri kalvarata ē tik verp, tik verp. Vuo jau svēka, kāp rēdēks, nier pri daktara bovosi ēr nikuokiu liekarstiu nevirtuo. Pu vakaruškas nesētrainiuo ē meiložē netor.

Vēino tarpo, ka anuos abēdvē ēš truobā ēšējē, Pietris atsēdarē pastalčio ēš tēn pajiemēs doru rakta prēbiega pri kalvarata ēr pu lēnū koudelio anou pakabēna.

Pu vaišiu vēsē sorokava ka pu nedielē viel atvažiavos galotēnā sosētartē diel pasuogas, diel ožsaku bažnīčiuo ē diel šliūba...

Kāp jau bova sosērokavē, kēta sobata vīrā viel novažiava pas muotrēškas. Vuos spiejē gerā apšeltē Aguota teraujēs jaunēkē.

– Petrāli, a praeita karta nematē špikieriaus rakta. Kažēn kor prapuolē, tēik liobu keravuotē, niekamē nebrondo. Vuo rasintās tamista paštokavuojē?

Vaikis prēējē pri kalvarata, pakielē lēnu koudieli ēr saka:

– Va šētā rakts, muotrēškelēs!

Senājē ožkrēta žads. Sosējiemē galva ēr nie krust. Jaunuoji, kāp lēipsnuos apjimta, sproka i ožpečēnē.

Va, ē pasēruodē anuos darbštoms. Vīrā ēšdolkiejē kētor gaspadēnēs ēiškuotē.